

Nouvo

Newsletter of the Seychelles National Party

Vol. 18 Nimerò 19 (8 Oktob 2009)

Vizyon

Debout pour Laliberte

Dimans le 4 Oktob, en gran lafoul ti dreponn lapel SNP e rasanble lo Freedom Square pou manifeste zot sipor pour travay ki SNP pe kontinyen fer. Tenn ki ti n ganny swazir sete Rasanble pour Laliberte. Rezon pou swazir en tel tenn ti akoz nou tya pe osi komemor bann levennman le 3 Oktob 2006, kan Prezidan ti donn lord pou bat bann dirizan e siporter SNP letan nou ti pe sinny petisyon devan Lasanble Nasyonnal pour drwa lekspresyon atraver nou radyo lib.

Debout pour laliberte

I tre enportan pour tou Seselwa kontinyen retir lafreyer pou eksprim zot ouvertman. Nou bezwen realize ki pli nou reste trankil, pli SPPF pou pil lo nou e sa dan limenn pou detri nou pei e nou pou kontinyen soufer. Letan nou debout pour laliberte, nou pa pe fer dezord, me nou pe plito atas nou byen for avek sa drwa ki nou annan anba Konstitisyon, me ki bann lotorite pe siprim li pour le moman. Alor sak Seselwa i bezwen debout byen for pour sa drwa laliberte.

Siporter i determinens

SNP i determinen pou war sa Sesel vreman lib e Seselwa viv dan lafyerte. Sa ti ganny manifeste par lakantite dimoun ki ti desann lo laplenn dan en moman kot napa okenn eleksyon, kot ti annan en kantite lafet partou lo Mahé. Dan sa gro soley byen for, siporter, enkli bann ansyen SPPF ki'n fatigue avek sistenn SPPF, ti fer zot prezans ganny konte. Avek sa kalite determinasyon ek travay dir, napa fason ki nou pa pou ranport laviktwar dan prosen eleksyon. Sa i en realite ki pe vin pli kler pour tou dimoun dousman-dousman. Dimoun in fini realize ki avek Mr. Michel, zis nou pei pou ganny vann avek Arab, e Seselwa pou napa nanryen byento.

Lazenes fodre debout for

Bann dirizan SNP ti lans en lapel byen for avek bann zenn pour zot pa les zot ganny afekte par bann fo lenflians bat latet ki SPPF pe kontinyen servi. Fodre tou-l-tan mazin en ki SPPF i rod aste bann zenn zis pour zot reste o-pouvwar, me ki apre zot pou ganny large byen fasilman. SNP i anvi en lazenes solid e for, ki pran son prop desizyon e ki devlop dan en fason kot i vin endepandan e pran kontrol son desten. Sa i en gran diferans avek sa ki SPPF i anvi. Avek SNP, napa okenn lentansyon kontrol, me se plito vre laliberte e lafors ki nou pe rode pour nou zenn e nou popilasyon. Se sa ki pou donn nou en pep solid.

SNP: Lavenir Sesel

Sesel pou kontinyen tourn an-ron anba SPPF. Napa en bon semen ver en lavenir stab kot pri lavi i akseptab pour tou dimoun. Anba SPPF nou pou kontinyen trouv fo promes e soufrans ki ogmante. Mansonz pou reste fason fer e fason viv. Ou pou reste en lesklav mantal. Me avek SNP, ou avek ou fanmiy pou konn vre laliberte ek prosperite. Ou pou ganny ou laliberte e ou pou kree sa prosperite ki pou donn ou en meyer lavi. Ozordi SNP i demann ou pou kontinyen reflesi lo ou sitiasyon lavi, lo lafason ki ou ti vote e pran en desizyon. Lavenir Sesel i avek SNP. Debout ozordi e zwenn nou dan sa lalit pou transform Sesel.

Nou Pa Pou Zanmen Oubliy le 3 Oktob



Le 3 Oktob i reste en zour enportan pour SNP dan nou lalit pour laliberte lekspresyon. Bann dirizan SNP ti desann ankor kot Libreri Nasyonnal ekzatemman 10er pou kriy byen for Nou Pa Pou Zanmen Les Tonbe! SNP pou kontinyen lite afen ki tou Seselwa i viv dan laliberte e ganny sa drwa lekspresyon. Fodre ki nou lib dan nou prop pei.

Mansonz par Grap!

Travayer lasante ti vremen soke pou antann bann deklarasyon ki zot minis ti fer dan Lasanble Nasyonnal Mardi pase. Preski tou sa ki i ti dir lo kondisyon bann travayer lasante ti fo e sa in fer bokou sa bann travayer vin fristre akoz zot in perdi plis konfyans ankor dan promes sa minister e pli spesifikman dan promes gouvèrnman Jj.

Bann mansonz ti enkli allowans pour overtime. Sa i fo. Napa personn ki ganny peye anplis pour travay ki zot fer. Zot tous zot menm lapey malgre ki zot donn plis er-d-tan konpare avek o-paravan.

Napa okenn travayer lasante ki ganny manze letan zot pe travay lo ward. Zot bezwen rod zot prop manze malgre ki zot bezwen travay pour environ 12 er-d-tan 'night shift'.

Sa ki minis i dekri koman moman repo se letan en ners i ganny en pti sans ferm son lizye lo en sez ki rann li pli fatige olye servi koman en repo.

SPPF i koz lo ners labous plen zis pou anbet zot. SNP i dir zot ki si zot vremen serye, balans lapey tou bann travayer lasante. Retir tou bann inegalite dan lapey e donn zot tou en bon logmantasyon. Se dan sa fason ki zot ava ankorouraz travayer pou donn en meyer servis e retir tou dekourazman ki pe afekte bann travayer ozordi. Parey Mr. Ramkalawan ti dir, 'Si SPPF ti war li nesesser pou donn Sef Ziz en logmantasyon lapey 40%, akoz tou bann travayer pa ganny sa menm pousantaz logmantasyon?'

Ozordi i kler pour tou dimoun ki SPPF i prefere fer fo propagann pou anbet lepey Seselwa. Erezman dimoun i war zot byen kler e dimoun pe konpran pli byen sa bann bat latet. Dousman-dousman lizye sa pep pe ouver. Atansyon son rezilta!

PAS PARTOU

People Plus i fer gro fot

Dan son demyen edisyon, 'People Plus' in fer en gro fot. Zot ekri ki loto Mr. Ramkalawan S24 i ganny trouve dan minwi anler Vilaz Mandarin dan Au Cap. Zot in fer en gro fot akoz loto ki zot devret war laba se loto en tre o zofisye SPPF. Se li ki annan en galan avek en zanfan laba. Dan minwi Mr. Ramkalawan i lo son lili kot son fanmiy!

1 zour konsilte 1 zour politik

Alor tou dimoun i devret kontan ki klinik Glacis in reouver. Me malerezman in pa'n reouver vremen pou donn dimoun en servis lasante. Sa 2 zour pou ganny

divize dan sa fason. En zour pou annan en dokter Endyen ki pou konsilte dimoun e donn zot latizann. Me sa lot zour i pour Dr. Payet zis vin fer politik. Klinik pou ganny servi koman son biro pou rankontre dimoun avek problemn politik. Sanmenm sa ki Jj i dir zot serye? Bate!!!!

Gaspiyaz resours pei

I kler ki nou annan en gouvèrnman ki plenny napa resours, me ki konn gaspiy resours. Minister lasante ti ferm serten klinik, me pour rezon politik e zis pou donn lenpresyon ki Mr. Michel i ekout zabitan distrikt, zot in decide reouver serten klinik. Plis resours leta pe ganny gaspiye zis pou fer transfer. Me Port Glaud tou i fermen. J i dir zot dan kazo!

SPPF i pous plis travayer ankor

Sak fwa ki SPPF i pran en desizyon pou pous travayer dan servis piblik, premye keksoz ki zot dir se ki sa bann dimoun pa pou perdi zot lanplwa, e ki tou keksoz pou ok. Apre sa, nou war dimoun pe perdi lanplwa par kantite. Se sa ki pe arive aktyelman e tou travayer i devret ouver zot lizye byen gran.

Premyerman Minis Faure in esey anbet bann gard sekirite. In dir zot ki zot pou nepli ganny apele 'Gard Sekirite', me 'Security Officer'. Ki diferans i annan ant sa 2? Me SPPF i konnen ki letan ou transfer travayer dan en lakonpannyen prive, sa lakonpannyen i pran son desizyon lo ki kantite travayer i bezwen. Malerezman SPPF i tanpi konnen kwa ki arive avek ou. I plito entereze avek son

program e i prefere lav son lanmen dan tou.

Me deza lezot travayer pe ganny kriye pou dir zot fer en swa: Aksepte sa ki zot pou ganny ofer oubyen demisyonnen. Travayer ledikasyon ek dan biro DA pe ganny demande pou fer sa swa. Travayer dan biro DA pe vremen mal pase, e bokou pe atann kwa ki pou arive la ki zot pe ganny forse pou aksepte sa ki Marlene Vidot i dir zot.

Seselwa, ouver zot lizye byen gran. Pa les zot ganny anbete. SPPF in byen servi zot, ozordi i pe kras zot. Me pa oubliye, pli pre avek eleksyon, i pou vin rod zot ankor pou bat zot latet. SPPF i kwar ki ou en lobze. Montre zot ki ou osi ou annan disan dan ou lavenn, e ou'n konpran zot zwe. Annan sa kouraz e fer zot aret pran ou pour en lenbesil.

Oli lidantite SPPF?

Yer SPPF ti deklar li koman en parti sosyalis. Apre zot ti dir ki zot plito sosyalis. Me ozordi napa pli gran kapitalis ki zot. Sef i oule mars zis dan Private Jet e frekant zis saki pos i lour avek larzan petrol. SPPF nepli entereze avek sa bann siporter ki n debout dan laplenn depi bomaten pou fer zot sef.

Ozordi zot nepli entereze avek sa bann malere, me zot pe rod zanmi ki annan biye. SPPF nepli fatig li avek soufrans son dimoun. I plito koz lo reform. Eski i pa konnen ki dimoun pa met reform lo lasyet? In sitan perdi kontak avek lepep ki i pa konnen ki kantite paran ki napa ase pou nourri son fanmiy.

Seselwa, reflesi, e regarde ki'n arive avek sa parti SPPF pour ki ou ti vote demyen fwa. Eski sanmenm sa parti ki ti dir ou i entereze avek ou? Lekel ki ou war pe defann ou ozordi? Wi, se SNP ki pe debout obor bann viktim SPPF.

SPPF i admet en lot gaspiyaz

Tou lezour en nouvo laverite i ganny devwale lo ki mannyer SPPF in fer son travay dan lepase. Zot rapel ki mannyer SPPF ti dir ki desalinasyon i vremen bon e i form parti en stratezi fantastik? Ekoute aprezan ki Onorab Joseph Fran ois in dir dan Lasanble: Fodre pa ki nou fer menm fot parey desalinasyon san pran kont son kou. Sanmenm sa bon plan?

Radio Freedom

Radio Freedom Nimero 2 i deor! Kontakte ou reprezantan distrikt e fer sir ou ganny ou kopi. Partaz li avek en zanmi SPPF. Fodre ki dimoun i konn laverite.

Ansenyan i dezapwente avek SPPF

Ansenyan atraver zwe politik e la zot pe dir ki pei i santi gran dezapwente man avek sa pou arive an 2011. Bann ansenyan i dekouraze e zot Minister Ledikasyon vi ki nepli kwar sa bann zoli parol ki SPPF i dir lo zot size. zot in decide pou pa reviz zot 'Scheme of Service'. Sa ti SNP i ensiste ki ansenyan ek sipoze fer depi 2008. tou travayer i merit logmantasyon lapey. Parey labitid, SPPF pe tasyon lapey.

Young Leader i fer karikatir dan Lasanble!

Onorab Terrence François, en dimoun ki n kalifye anba program Young Leaders in fer SPPF onte dan Lasanble. I ti prezant en mosyon me pa zanmen koz lo la. Letan Speaker i dir li adres son mosyon, i ti termin son diskour e dir i pou fer rekomandasyon dan son rezime apre deba. Mr. Speaker, byen araze, ti termin Lasanble akoz i ti war ki sa Onorab tya pe zis fer karikatir e gaspiy letan Lasanble! Kisisa sa? Bite!!!!